



18. marts 2014

UPA 2014/76

Inatsisartut Suleriaasianni § 33 naapertorlugu aalajangiiffigisassatut siunnersuut matumuuna saqqummiuppara:

**Ulloq 1. januar 2015 aallarnerfigalugu ukiuni tulliuttuni sisamani KNR-mut aningaasaliissutit qaffannissaannut Naalakkersuisut peqquneqarnissaannik Inatsisartut aalajangiiffigisassaattut siunnersuut. Aningaasaliissutit ilassutaat tusagassiortut immikkut qaqilerilluni radiomi, tv-mi qarasaasiamilu nutaarsiassalerinermut taamaallaat atorneqassapput**  
(Inatsisartunut ilaasortaqaq Andreas Uldum, Demokraatit)

### **Tunngavilersuut**

Tusagassiorfiit nunatsinni demokratimut pingaaruteqarput. Tusagassiorfiit aqutigalugit nutaarsiassat siammarterneqartarput. Tusagassiorfiit taakkuupput mamianartulianik annertuunik saqqummiussisartut. Aamma tusagassiorfiit nipilersuutinik kulturimullu tunngasunik allanik oqaatsigut atorlugit nerlersortarpaatigut.

Arlaannaattaluunniit ilumoorluni oqaatigisinnaangilaa tusagassiorfiit pisariaqanngitsut. Tamarluinnatta kalaallit tusagassaqaartitsivii minnerpaamik ullormut ataasiarluta attuumassuteqarfigisarpagut.

Tusagassioriaaserli aalajangersimasooq maani nunatsinni aallunneqanngilaq, tassalu qaqilerilluni piviusulikkersaarusiortarneq, annertuumik sukumiisumillu sulianut tunngasunik naqqa tikillugu paasiniaasarneq. Tusagassiorfinni piumassuseqannginneq pissutaagunangilaq tamatumunnga pissutaavorli tusagassiorfik aalajangersimasumik qaammatini arlalinni qaqilerisitsinissamut akissaqannginneq.

Demokraatini isumaqarpugut tamanna uggornartoq. Kissaatigigaluarparput uranimik piaaneq pillugu qaqileralluni tusagassiorfik qarnissaa, peqqinnissaqarfimmi aningaasat eqqortumik atorneqarnersut imaluunniit immaqqa qaqilerneqarsinnaagaluarpoq meeqqat angerlarsimaffiup avataanut inissitat iluamik pinerigut nunarsuup sinneranut naleqqiullugu. Aamma soqutiginassagaluarpoq silap pissusaata allanngoriartornera piniartunut qanoq sunniuteqarnersooq qaqilerneqartuuppat. Imaluunniit qaqilerneqarsinnaagaluarpoq inuusuttat nunani allani ilinniartut ilinniareeraangamik sooq nunatsnuttu uterusunneq ajornersut. Allatut oqaatigalugu tusagassiorfik qaqilersinnaasaat killeqanngikkaluarput.

Tamanna tunngavigalugu siunnersuutigaarput, uangut Inatsisartut 2015-mut Aningaasanut Inatsisip suliarineranut atatillugu KNR-mut immikkut 3 mio. koruuninik aningaasaliissasugut – taakku aningaasat qaqilerisartunik pilersitsinermut sulinerannullu taamaallaat atorneqartassapput. KNR-ip ukiut tamaasa nalunaarusiorfigisassavaa aningaasat qanoq atorneqarsimanersut taamatullu aamma aningaasat atunngitsuukkat landskarsimut uterteqqinneqartassapput. Imaassanngilaq atunngitsuukkat KNR-p sinnerata ingerlanneranut atorneqartassasut.



Demokraatini isumaqarpugut pingaaruteqartoq, qaqilerisartuulersussat ukioq ataaseq qaangiunniariartoq unitsinneqassanngitsut. Taamaattumik aalajangiiffisassatut siunnersuummi pivarput piffissaq ukiunik sisamanik sivisussusilik. Aamma taamaaliornikkut pikkorissut tusagassiortut pisarsiariuminernerussapput, ilisimassagamikkut – ukiuni arlalinni sulinissartik qularnaarneqareernikuusoq. Ukiut pingasut siulliit pereerpata Namminersorlutik Oqartussat KNR piumaffigissavaat ataatsimoortumik nalilersueqqullugu aaqqissuussinerup ataannarnissaa siunertaralugu.

**Pisortanut aningaasarsiornikkut allaffissornikkullu kingunissai**

Siunnersuut ataatsimut isigalugu Namminersorlutik Oqartussanut ukiumut 3 mio. koruuninik aningaasrtuutaassaaq ukiumi aningaasaliiffiusumi 2015-mi ukiunilu tulliuttuni missingersersuorsiorfiusuni. Siunnersuut Ilinniartitaanermut, Ilageeqarnermut, Kulturimut Naligiisitaanermullu Naalakkersuisoqarfiup missingersuutaasa isumaqatigiinniutigineqarnerannut ilanngunneqassaaq – ajornanngippat allatigut sipaaruteqarnikkut, aningaasartuutit tamakkiisut pisortanut iluanaarutaaqqunagit nanertuutaqqunagilluunniit.

**Namminersortunut aningaasarsiornikkut allaffissornikkullu kingunissai**

Soqanngilaq

**Innuttaasunut aningaasarsiornikkut allaffissornikkullu kingunissai.**

Soqanngilaq